

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 476 del 26/02/2026

Mattle, Fugatti, Kompatscher un di asesör vor in spòrt gratuliert di atlétn von drai Lentar. In di auzlegom von Euregio atz Innsbruck est izta da olimpische stòrdja o

Di kampiü von Euregio: 24 olimpische madadje

[Cimbro] Gántz guate risultate vor di atlétn von Euregio Tiról-Südtiról-Trentino afte XXV bintarn Olimpische spiln: in 21 gare, di 29 atlétn von drai Lentar hãm gebunnt in fra alle 12 goldane madadje, 14 silbrane un 17 bronzeg.

Zelante di madadje lai vor an uantzegen spòrt (un nèt vor an uantzegez mentsch) dar Euregio gebinnt in gántzan 24 madadje: 7 goldane, 8 silbrane un 9 bronzeg.

Dar vorsitar von Euregio un hauplantsmänn von Tiról Anton Mattle, pittnândar pinn vorsitar von autonomen Provintzan vo Tria Maurizio Fugatti un vo Poatzan Arno Kompatscher un di asesör vor in spòrt Philip Wohlgemuth (Tiról), Mattia Gottardi (Trentino) un Peter Brunner (Südtiról), khön ke 'z iz eppaz gántz bichte bomen nia berat impitet: übar di grentzen, di Lentar von Euregio no a bòtta zoangse starch gepuntet panândar in soi traditziong vor di bintarn spòrt. Olimpische atlétn un atléte soinese gezoaget, guat, resistente un pittnan starchan karatere. Ma gratuliertze pitt alln in atlétn von Euregio boda hãm genump toal in Olimpischen spiln: pitt soine gare hãmsa geschenkht magische moméntn, ankunto o in fading un dar arbat boda vil laüt un sportif organizatzionen hãm gemacht hintar nã.

Vo est vort mkma khearn zo leba da olimpische stòrdja von Lentar von Euregio in Euregio Infopoint vo Innsbruck: da didjital auzlegom sidar bintsche iz khent auzgebetart pittnar naüing sektziong boda ágeat disan lestn Olimpischen spiln o. Di auzlegom iz khent offegetánt atz 3 von hornung pasàrt, un hatta genump toal dar tirólar vitzevorsitar Wohlgemuth pittnândar pinn kuratór Christian Rainer, pinn Matthias Egger (kamòu Arkif vo Innsbruck), pinn profesör vodar Universitét vo Innsbruck Kurt Scharr un Wolfgang Meixner un pinn djenerál sekretardjo von Euregio Matthias Fink.

In da naüige sektziong makma seng bazta iz vürkhent in di Olipimschen spiln von 1964 un 1976 bodase soine gehaltet atz Innsbruck un kontàrt allz daz schümma, un laidar zèrte vert daz letz o, von atlétn un atléten von Tiról, Südtiról un Trentino partirante vo balda soine ágeheft di Olimpischen spiln sin in ta' vo haüt. In di månat boda khemmen bartnda khemmen no zuagelekk ándre sachandar boda ágian disan lestn Olimpischen spiln 2026 o, 'z bartnda khemmen gezoaget di gare vo biathlon atz Rasen-Antholz un di nòrdischen disziplin in Fiemme Tal, dise plètz von Euregio est mangse hoazan olimpische setz.

In dise Olimpischen spiln hãmda genump toal in gántzan 124 atlétn von Euregio, vo disan 41 von Tiról, 47 von Südtiról un 36 von Trentino. Di atléte un atléten von Südtiról hãm gebunnt in fra alle 15 madadje, nã khemmenda di sèlln von von Trentino un von Tiról pitt 14 madadje; 11 madadje hãmse gebunnt di baibar un 18 di månnen.

Ma mage nèt konfrontàrn un zeln garade di madadje von Euregio pinn sèlln vodar ufizièll sàmmelung: aftna sait dar Euregio mage roatn an pòdio vor aniaglana gara asó azpe in da ufizièll sàmmelung. Ma mocht però haltn kunt ke in di gare in squadra un in di staffette, di atlétn von Euregio hãm gebunnt pittnândar pitt ándre vodar belesan un österrachege federatziong.

In soi roatom dar Euregio hatt gezelt a madadja vor mensch. In di gare a squadre un in staffetta dar Euregio gebinnt asó mearare madadje azta daz mindarste zboa soine atletn soin gânt aftn podio.

Da gekhluppet di madadje un di kampiü

Übarsetzt von Schaltarle vor di zung von Toalkamou vodar Zimbar Hoachebene

(cdt)